

何水部集

《四部備要》

集部

上海中華書局據文瀾閣
本校百三名家集本校刊

桐鄉 陸費達總勘

杭縣 高時顯輯校

杭縣 吳汝霖監造

版權所有不許翻印

何水部集目錄

賦

窮鳥賦

牋

與建安王謝秀才牋

爲孔導辭建安王牋

書

爲衡山侯與婦書

七

七召八首

樂府

銅雀妓

門有車馬客

詩

九日侍宴樂遊苑 登石頭城

望解前水竹答崔錄事

暮秋答朱記室 酬范記室雲

落日前墟望贈范廣州雲

日夕望江山贈魚司馬

答丘長史 道中贈桓司馬季珪

夕望江橋示蕭諮議楊建康江主簿

寄江州褚諮議 入西塞示南府同僚

下直出谿邊望答虞丹徒敬

贈諸游舊 贈族人秣陵兄弟

秋夕仰贈從兄寘南

仰贈從兄興寧寘南

贈江長史別 送韋司馬別

南還道中送贈劉諮議別

與崔錄事別兼敘攜手

別沈助教

別

贈韋記室黯別

渡連圻二首

入東經諸暨縣下浙江作

還渡五洲

日望水

宿南洲浦

和蕭諮議岑離閨怨

嘲劉諮議

擬青青河畔草轉韻體爲人作其人識節工

歌

聊作百一體

臨行公車

夜夢故人

霖雨不晴懷郡中游聚

劉博士江丞朱從事同顧不值作詩云爾

春暮喜晴酬袁戶曹苦雨

苦熱

揚州法曹梅花盛開

行經孫氏陵

哭吳興柳惔

答高博士

塘邊見古塚

登禪岡寺望和虞記室

贈王左丞僧孺

與沈助教同宿湓口夜

與蘇九德別

初發新林

下方山

春夕早泊和劉諮議落

和劉諮議守風

學古贈丘永嘉征還

學古贈丘永嘉征還

詠照鏡

學古三首

早朝車中聽望

秋夕嘆白髮

從主移西州寓直齋內

從主移西州寓直齋內

從主移西州寓直齋內

從主移西州寓直齋內

從主移西州寓直齋內

從主移西州寓直齋內

從主移西州寓直齋內

從主移西州寓直齋內

從主移西州寓直齋內

從主移西州寓直齋內

從主移西州寓直齋內

敬酬王明府

西州直示同員

野夕答孫郎擢

石頭答庾郎丹

日夕出富陽浦口和朗公

臨行與故遊夜別 胡興安夜別

車中見新林分別甚感

曉發

慈姥磯

見征人分別

同虞記室登樓望遠歸

與虞記室諸人詠扇

看伏郎新婚

詠娼婦

詠舞

望新月示同羈

詠春雪寄旅人治書思澄

和司馬博士詠雪

詠白鷗兼嘲別者

行經范僕射故宅

王尚書瞻祖日

送褚都曹

送司馬□入五城

邊城思

爲人妾思二首

爲人妾怨

閨怨二首

南苑

苑中見美人

詠春風

離夜聽琴

相送

答江革聯句不成

又答江革

詠雜花

聯句

擬古三首聯句

往晉陵聯句

范廣州宅聯句

相送聯句

至大雷聯句

賦詠聯句

臨別聯句

增新曲相對聯句

照水聯句

折花聯句

搖扇聯句

正釵聯句

附錄

本傳

何水部集目錄

何水部集

賦

窮鳥賦

梁東海何遜著

嗟窮鳥之小鳥意局促而馴擾聲遇物而知哀翻排空而不矯望絕侶於夕霞聽翔羣於月曉既滅志於雲霄遂甘心於園沼時復搶榆決至觸案窮歸若中氣而自墮似驚弦之不飛同雉堞而共宿啄鴈稗以爭肥異海鷗之去就無青鳥之是非豈能瑞周德而丹羽感燕悲而素暉雖有知於理會終失悟於心機

賦

與建安王謝秀才牋

州民泥塗何遜死罪即日被板以民充年秀才民謝聲□□□非關右月旦□□□名誰錄覩物託興乏澹雅之才□□□文豈飄然之作伏惟大王殿下令聞令望邁楚逾河好德好士雲歸海赴若夫選重雄州望隆觀國必使聲高後進德繼前修民學異扣鐘辨漸炙輒將以允應貢選待問金門上第甲科既慚髣髴管窺雖畫彌畏友朋恩榮忽賁固請無涯便當妄忝魯服濫同齊吹戰荷屏營忻惶共色不任下情謹奉牋以聞

爲孔導辭建安王牋

士竇塗泥美非竹箭昔逢際會忝申名質悠悠漢水獨驚輕舟雖慕義如歸而暗投多懼遂禮頻上

席愛比後車感此隆遇久知輕死軒蓋出內歷念陪遊府朝升進隨事多幸賜餘論於顏色奉德音於宴和藉此增榮遂延繆價今便除名復□足在寬身非木石戀同犬馬雖朝夕曳裾無違接待而職務一離有同賓客瞻塔下拜屑涕無從永言僚故載懷罔已頡頏之禽慚悲於出幕蒙茸之獸結志於首丘

書

爲衡山侯與婦書

昔人遨遊洛汭會遇陽臺神仙髣髴有如今別雖帳前微笑涉思猶存而幄裏餘香從風且歇掩屏爲疾引領成勞鏡想分鸞琴悲別鶴心如膏火獨夜自煎思等流波終朝不息始知萋萋萱草妄憂之言不實團團輕扇合歡之用爲虛路邇人遐音塵寂絕一日三秋不足爲喻聊陳往翰寧寫款懷遲枉瓊瑤慰其杼軸

七

七召八首

假氏先生負茲勁挺狀羣飛之喪侶似獨行之迷徑神忽忽而若忘意衝衝而不定監丹綠其無主聞鐘鼓以失聽至乃冬霰積庭室靡人聲春花滿野地無行者園堵常閉曲突無烟同生芻之有束共死灰之噓然篤論公子聞而崛起雖道術之可忘亦切嗟之所恥命徒御以駱驛將有事乎巖中車煜燭而流水馬泮渙以追風乃踰汗漫入朦朧至深潭之澳溟有洞室之穹崇居隱磷而出沒望

嶽岑而上下竹距石以表通水韻松而含響地不寒而蕭瑟月無雲而曠朗於是整容投刺屣履排門揚眉就席舉袂而言曰若五秀稟其生靈六情通其愛惡憎共集於鄙老嗜同歸於美樂今足下羣鳥獸以爲娛處貧賤而不忤欲實實於孤界乃貽譏乎隕穫至乃喀喀死於道邊貿貿填於溝壑削松筆以畫虎鼓鉛刀而刻鶴身既勞而不勸事何感而莫懲欲模名而帶索豈知命於泥繩何異走長衢而避影煎流水以求冰今欲導足下以衛生之祕術怡神之妙道譬愈我於沉痾若起尸於仙草寧願聞乎先生曰有爲之生已逼無益之慮常勞若見明於凝滯幸求教於針膏

宮室

公子曰千門始構百常洞啟激渚開渠疏山抗址延袤水陸曠望東西下臨江海上屬雲霓百丈杳冥以飛跨九層鬱律以階梯步三休而未半途中途而方迷雕牆曲屈以交牙網戶周流以重積既陰岑而影響亦叫嘯而迴易沙板金鋪紫柱玉爲煒煌燿葩硃博敞圖雲霧之蔽虧壯神仙之來往壁璫自耀珠綴嘗響蟬蛸動而畫喧燿耀飛而夜朗既臨下以濇沈亦憑高而決濟聞疾雷於階榭美奔星於帷幌旦以曲堂周以洞房北負連闌南注長廊綺疏爽映鏤檻相望燕飛蓮井日照杏梁陽鳥驚其將動雲鳳矯而欲翔若乃凌沼開源延石崇壤疑崑閬之鬱第倅滄溟之瀟灑其中別有桂宮柏寢吳臺柘館複道耿介而連雲阿閣穹

窿而仰漢望虬欄之映水見丹鶴之出岸豔草奇色嘉樹珍名長生靈壽男華女貞河柳垂葉山榴發英翫奇花之春滿摘甘實於夏成此實宮苑之壯麗豈能從我而爲榮先生曰多言反道辨口傷實懼貽弊於蔀家且自求乎容鄙

餽饌

公子曰銅餅玉井金釜桂薪六彝九鼎百果千珍熊蹯虎掌雞跖猩脣潛魚兩味立犀五肉拾卵鳳巢剖胎豹腹三鸞甘口七菹愜目蒸餅十字湯官五熟海椒魯鼓河鹽蜀薑劑水火而和調糅蘇菽以芬芳脯追復而不盡積稍割而無傷龜羹流獸蜃醬先嘗鱠溫湖之美鮒切丙穴之嘉魴落俎霞散逐刃雪揚輕同曳璽白似飛霜蔗有盈丈之名桃表兼斤之實杏積魏國之貢菱爲巨野所出衡曲黃梨汶垂蒼栗隴西白柰湘南朱橘荔枝沙棠蒲萄石蜜瓜稱素腕之美棗有細腰之質並抗吻以除煩永咀牙而消疾於是三雅陳席百味開印玉璣星稀蘭英縹潤既夷志於坎壤亦忘懷於鄙忝此蓋滋旨之極珍豈從余而並進先生曰不貴餼食豈甘醇酒既深悟於腐腸豈自迷於爽口

聲色

公子曰秦氏獨立燕姬絕世如短如長不穠不細信耳目之珍冶乃古今之佳麗妍姿豔逸淑性閒華效施朱於宋里結墮馬於梁家相纖腰以微步呈皓腕於輕紗臨池正領拂鏡看花觀堵牆以颯沓傾城國以喧譁墨如歸而抽軫惠將返而迴車

至乃鄭衛繁聲抑揚絕調足使風雲變動性靈感
召擊哀響則春臺之人愴焉而雪泣起懽情則崩
城之婦粲然而微笑蘇谷調鳳之管龍門獨鶴之
柯綠珠絳樹宋謁韓蛾青春婉婉上客經過開洞
房以命賞召才人而合宴舉輕慢以徐來隔珠簾
而可見牀披象簾戶垂羅薦聽促柱之方道聞度
聲之始嚙步想象以頓足腕踴躍而拂面託斜視
於遺簪寄含情而舉扇俄而夕驚東返落日西懸
綺霞映水蛾月生天解鴛鴦之繡被拂蜚蛺蝶之長
氈燭中帷而動爛香出帳而微烟願橫施以自昵
脫斜領於君前此乃聲色之妖蕩將不從我而流
連先生曰淫聲非篤論之旨麗色乃余情所棄伐
國不問仁人此言何從而至

仙遊

公子曰歲晚農收時閒務隙山火已燎野霜初白
聊菽殺於秋冬將從禽於草澤蜀地五丁齊都二
子氣動山漂汗揮雨起渥洼流頰護蘭泄血躡飛
影於未形奔流星於欲滅革車隱隱數騎闐闐鼓
噪喧而振地系徒駭而聒天割玉之刀飲石之箭
置羅布其一目罟網周其三面犬號驤騫鷹各奔
電暫離已合忽隱仍見赴迥趨危衝林跋險草隨
足起山從眼轉跨躡谿澗電舉陵陸鳥不及飛獸
不遑伏既前躡而後倚亦左排而右蹴躡實駭而
自救騰靈亂而相撲視灑血之丹地見飛毛之暗
目傍窮劫敵勢極搜求文皮坐裂驕尾生抽手羈
鐵頂足批銅頭象折齒而陵遽貊拉幽而夷猶擒

高樓之度索走大樹之神牛鴈聞弦而跼墮猿抱
木而啾啾啖楚王之雲夢取漢帝之中流此武材
之矯猛豈能從我而畋遊先生曰馳騁傷仁好殺
非勇幸廣內之豐樂何禽荒之足重

神仙

公子曰陵鳥始照官槐遽而欲舒顧免纔滿庭英
紛而就落譬光影於飛浮比生靈於栖託擾擾摩
肩鱗鱗方駕空怵迫於毀譽獨慙慙於用舍嗟向
有而今無數後榮而前謝清歌雅舞暫同於夢寐
廣廈高堂俄成於幻化若夫洗精服食慕道遊仙
尋玉塵於萬里守金竈於千年三尸可度九轉難
傳飛騰水陸咀嚼靈玄若乃壁上真辭枕中秘要
彈壓鬼神吐納靈妙既變醜以成妍亦反老而爲
少虬駕天矯而出沒霓裳颯沓而容與接鵲馭於
後乘追鳳簫於前侶雨散漂以霑服雲霏微而襲
予瞰芝闕以杳冥見玉臺之相拒蓋排烟而漸滅
旌拖風而未舉值解佩於江濱逢弄珠於漢渚薄
遊玄圃弭節泰華列神童於羽帳侍玉女於仙車
澗采今危實苑拔今迴花聽弱水之晨浪望崑山
之夕霞窮北辰而比壽指中岳以爲家此神仙之
恍惚豈從我而謁邪先生曰捕影之言莫測繁風
之論難盡未嘗留意於死生豈復稍論於椿菌

儒學

公子曰洙泗遺文鄒魯餘烈其道未迷其風不絕
方領圓冠金口木舌談章句之遠旨構紛綸之雅
說陳五禮明六詩貫穿微妙辯析毫釐既待問於

重席亦覃思而下幃醞籍愷悌和樂緝熙生徒肅肅賓友師師並接衽以聞道俱援手而授辭心絕內戰事無外欲橫經者比肩擁簪者繼足醜申韓之法令陋桓文之風俗六郡淒其衣冠五陵窮其軌躅信斯文其若水實斯人之如玉若夫珠璣產於蚌蛤珪璧出於山淵未有玉不瑩而爲寶人無學而稱賢蓋持身之筦籥進德之舟船響如鐘而待叩明似鏡以長懸此見重於經術寧降志於吾賢先生曰誠此言之甚美比斯道之爲曠恥見嘲於腐儒豈求珍於席上

治化

公子曰我大梁之啟基方遠古而無匹先天定始比殷周而餘裕揖讓受終考唐虞而不失道德有序憲章咸秩六府孔脩百司盡畢披求儒雅摭拾遺逸旻食思治雖聞之於昔談味且臨朝乃見之乎茲日蕩蕩薰風泱泱大典道含洪而廣被澤汪穢而傍闡採輿人之片言納匹夫之小善事在微而畢照物無幽而不顯若夫下車布德伐罪弔民風無偃稼雨不破塵覩勝殘於暮月見成俗於浹辰含羣生兮如海養萬類兮猶春鄉無豕食之棘野靡狼顧之民樵者目金以知恥耕夫讓畔以成仁何大庭之足競豈粟陸之能隣璧水道庠序之風石渠啟珪璋之盛奇士輻湊而騁足異人間出而效命小大之獄無冤民翺飛之物無天性故能睦之以九世齊之以七政坦坦恢恢巍巍赫赫政德洽於霜風教義窮於足跡望雲氣而款關候海

水而重譯所謂府不輟貢史無虛帛天瑞磊砢而相尋地符氛氲而不少收六穗於征賦翫九莖於池沼三足應感而來儀一角知時而自擾映景星於初冥聆鳳音於將曉若乃亭毒塊坱合天地而並施陶鈞日月與造化而齊功故非言辭之可具盡筆札之所能窮懷真獨往之夫奔走而從事滅迹藏名之士顛倒而向風二漢有同於兒戲魏晉無礙於胸中言未畢先生攝衣而起曰子前所說似玉卮之無當徒費辭而難領譬由背日而視秋毫卻行而求鄢郢一聞皇王之威則豁然神悟而理據志無時而可卷邦有道而宜舒敢以淺智請從後車

樂府

銅雀妓

秋風木葉落蕭瑟管絃清望陵歌對酒向帳舞空城寂寂簷簷一作宇曠飄飄帷幔輕曲中相顧起日暮松柏聲

擬輕薄篇

城東美少年重身輕萬億柘彈隨珠九白馬黃金飾一作長安九達上青槐蔭道植較擊晨已喧肩排環不息走狗通西望牽牛巨南直相期百戲傍去來三市側象牀香繡被玉盤傳綺食倡女掩歌扇小婦開簾織相看獨隱笑見人還斂色黃鸝悲故羣山枝詠新識鳥飛過客盡雀聚行龍匿酌羽方厭厭此時懼未極

門有車馬客樂府作何安非

門有車馬客言是故鄉來故鄉有書信縱橫印檢
開開書看未極行客屢相識借問故鄉來潺湲淚
不息上言離別久下言望應歸寸心將夜鵲相逐
向南飛

昭君怨

樂府作何安非

昔聞白鶴弄已自軫離情今來昭君曲還悲秋草
生

詩

九日侍宴樂游苑

爲西封侯作

皇德無餘讓重規襲帝勛垂衣化比屋瞻顧慎爲
君黜飛悅有道卉木荷平分宸襟動時豫歲序屬
涼氛城霞旦晃朗槐霧曉氤氲鸞輿和六龍鳳駕
啟千羣羽觴湛露份舞奏承雲禁林終宴晚華
池物色曠疏樹翻高葉寒流聚細紋晴軒連瑞氣
同飛一作惹御香芬日斜迢遞宇風起嵯峨雲運偶
參侯服恩洽廁朝聞於焉藉多幸歲暮仰遊汾

登石頭城

關城乃形勢地險差非一馬嶺逐紆回犬牙傍隆
宰百雉極襟帶億庾兼量出至理歸無爲善守竟
何恤眺聽窮耳目遠近備幽悉擾擾見行人暉暉
視落日連橋入迴浦飛蓋交長術天暮遠山青潮
去遙沙出薄宦惡師表屬辭慚愈疾願乘鰲鯨牛
還隱蒙龍室

望廡前水竹答崔錄事

拾遺作顧則心詩非

蕭蕭聚竹映澹澹平湖淨葉倒漣漪文水漾檀欒
影相思不會面相望空延頸遠天去浮雲長墟斜

何永部集 詩

落景幽痾與歲積賞心隨事屏鄉念一還迴白髮
生俄頃

暮秋答朱記室

游揚日色淺騷屑風音勁寒潭見底清風色極天
淨寸陰坐銷鑠千里長遼迥桃李爾繁華松柏余
本性故心不存此高文徒可詠

酬范記室雲

林密戶稍陰草滋堦欲暗風光蕊上輕日色花中
亂相思不獨懽佇立空爲歎清談莫共理繁文徒
可玩高唱子自輕繼音子可憚

落日前墟望贈范廣州雲

綠溝綠草蔓扶援雜華舒輕烟澹柳色重霞映日
餘遙遙長路遠一作晚寂寂行人疎我心懷碩德思
欲命輕車高門盛遊侶誰肯進敗漁

日夕望江山贈魚司馬

溢城帶溢水溢水縈如帶日夕望高城耿耿青雲
外城中多宴賞絲竹常繁會箏聲已流悅弦聲復
淒切歌黛慘如愁舞腰凝欲絕仲秋黃葉下長風
正騷屑早鴈出雲歸故燕辭檐別畫悲在異縣夜
夢還洛汭洛汭何悠悠起望西南樓一作樓西樓的的
帆向浦團團月映洲誰能一羽化輕舉逐飛浮

答丘長史

宿昔敦遠遊名分乃異路千里泝波瀾一朝披雲
霧從容捨密勿繾綣論襟趣披文極詆訶析理窮
章句明鐘信有待巨海誰能喻奔景驟西傾還途

七

忽東驚黃花發岸草赤葉翻高樹漁舟乍迴歸沙禽時獨赴宴年時未幾離歌倏成賦伊我念幽關夫君思贊務短翮方息飛長轡日先驅曝鯢□□走逸翮康時務握手異沈浮佳期安可屢

道中贈桓司馬季珪

晨纜雖同解晚洲阻共入猶如征鳥飛差池不可及本願申羈旅何言異翔集君渡北江時詎今南浦泣

夕望江橋示蕭諮議楊建康江主簿

夕鳥已西度殘霞亦半銷風聲動密竹水影漾長橋旅人多憂思寒江復寂寥爾情深聲洛予念返漁樵何因適歸願分路一揚鑣

寄江州褚諮議

自與君別離四序紛迴薄分手清江上念別猶如昨追憶邊城游奚尋平生樂俱登龍嵒嶺共坐逶迤閣清吹或忘歸繁文時間作連鑣戲淺草游憶遵長薄五載同衣裘一朝異睽索夫君頗留滯驂駢未沃若伊家從入闕終是填溝壑早秋正悽愴餘暉晚銷鑠林葉下仍飛水花披未落如何隔千里無由舉三爵因君奏采蓮爲余吟別鶴

入西塞示南府同僚

露清曉風冷天曙江晃晃一作爽薄雲巖際出初月波中上黯黯連嶂陰騷騷急沫響迴棹急礙浪羣飛爭戲廣伊余本羈客重睽復心賞望鄉雖一路懷歸成二想在昔愛名山自知權獨往情游乃落魄得性隨怡養年事以蹉跎生平任浩蕩方還讓

夷路誰知羨魚網

下直出谿邊望答虞丹徒敬

夫君美章句席丈珍梁楚伊余忝攝官含毫亦禁阻直廬去咫尺心期得宴語休沐乃幽棲別離未幾許佇立日將暮相思忽無緒谿北映初星橋南望行炬九重不可越三爵何由舉

贈諸游舊

弱操不能植薄伎竟無依淺智終已矣令名安可希擾擾從役倦屑屑身事微少壯輕年月遲暮惜光輝一塗今未是萬緒昨如非新知雖已樂舊愛盡睽違望鄉空引領極目淚沾衣旅客長憔悴春物自芳菲岸花臨水發江燕遶橋飛無由下征帆獨與暮潮歸

贈族人秣陵兄弟何思澄

吾宗昔多士文雅高縉紳小子無學術丁寧困負薪傍枝實紛亂領袖寄親姻名價齊兩許閨門比三陳風力咸通邁藝業並紛綸元方振高羽洛令初解巾自爾典名郡所在號清淳齊兒敢爲俗蜀物豈隨身祿俸不妻子謳吟乃吏民孰云穢明德惟在中聖人若能遺酌我稱首當屬仁仲將本特達坎壈猶賤貧方成天下士豈伊席上珍外情或簡易內鑒甚人倫時然臨下邑摘伏信如神顧余晚脫略懷抱日湮淪游宦疲年事來往厭江濱十載猶先職一官乃任真土牛竟不進蜀狗空重陳羈旅無偶匹形影自相親蕭索高秋暮砧杵鳴四隣霏霏入窗雨漠漠暗牀塵所思不可見邈若胡

與秦願子加餐飯夏會在何辰

秋夕仰贈從兄寘南

塔蕙漸翻葉池蓮稍罷花高樹北風響空庭秋月
華寸心懷是夜寂寂漏方賒撫弦乏歡娛臨觴獨
數嗟悽愴戶涼入徘徊欄影斜無爲淹戚里見就
還田家

仰贈從兄興寧寘南

家世傳儒雅貞白仰餘徽宗派已孤狹財產又貧
微棲息同蝸舍出入共荆扉松筆昭臨沼蒲簾得
垂帷幸逢四海泰日月耀增輝相顧無羽翮何由
總奮飛一朝異言宴萬里就睽違遠江飄素沫高
山鬱翠微相思對森森相望隔巍巍死灰終不然
長岑且未歸當憐此分袂脈脈淚沾衣

贈江長史別

二紀歷茲辰投分敦游處况事兼年德宴交無爾
汝中歲多乖違由來難具敘及君相藩牧伊予客
梁楚出國乃參差會歸同處所以茲篤惠好何用
忘羈旅重得申平生何年更睽阻龍禽恨踟躕促逸
翮超容與錢道出郊垌把袂臨洲渚長飈落江樹
秋月照沙渚遠送子應歸棹開帆欲舉離舟懼未
極別至悲無語安得生羽毛從君入宛許

送韋司馬別

送別臨曲渚征人慕前侶離言雖欲繁離思終無
緒悵悵分手畢蕭蕭行帆舉舉帆越中流望別上
高樓予起南枝怨子結北風愁遷山蔽日洵洵
浪隱舟隱舟邈已遠徘徊落日晚歸衢並駕奔別

館空筵卷想子斂眉去知予銜淚返銜淚心依依
薄暮行人稀暖暖入塘港蓬門已掩扉簾中看月
影竹裏見螢飛螢飛飛不息獨愁空轉側北窗倒
長簾南鄰夜聞織棄置勿復陳重陳長歎息

南還道中送贈劉諮議別

一官從府役五稔去京華遽逐春流返歸帆得望
家天末靜波浪日際斂烟霞岸聲生寒葉村梅落
早花游魚上急水獨鳥赴行楂目想平陵柏心憶
青門瓜曲陌背通垣長墟抵狹斜善鄰談穀稼故
老述桑麻寢興從閒逸計聽絕誼譁夫君日高興
爲樂坐驕奢室墮傾城佩門交接憶車入塞長雲
雨出國暫泥沙握手分岐路臨川何怨嗟

與崔錄事別兼敘攜手

去夏子回首言乃重行行今春游派滋訪子猶武
城暫別年逾半全歸月未盈復道中寒食彌留曠
不平道術既爲務權懷苦未并及爾沈痾愈值茲
秋序明石磧沿江淨沙流繞岸清川平看鳥遠水
淺見魚驚逝將窮履歷方欲恣逢迎何言聚易散
鄉棹爾孤征我本倦遊客心念似懸旌聞離常屑
涕是別盡淒清一作況此忘懷地相愛猶弟兄脈
脈留南浦悠悠返上京欲鐫星星鬢因君示友生

別沈助教

可憐玉匣劍復此飛鳬鳥未覺愛生憎忽見雙成
隻一朝別笑語萬事成疇昔道適若波瀾人生異
金石願君深自愛共念悲無益
與沈助教同宿湓口夜別

我爲潯陽客戒旦乃西游君隨春水駛鷄鳴亦動
舟共泛溢之浦旅泊次城樓華燭已消半更人數
唱籌行人從此別去去不淹留

與蘇九德別

宿昔夢顏色咫尺思言偃案作何況杳來期各在
天一面踟躕暫舉酒倏忽不相見春草似青袍秋
月如團扇三五出重雲當知我憶君萋萋若被逕
懷抱不相聞

贈韋記室黯別

故人儻送別停車一水東去帆若不見試望白雲
中促膝今何在銜杯誰復同水夜看初月江晚泝
歸風無因生羽翰千里暫排空

初發新林

伊昔負薪暇慕義遊梁楚短翮忘連翩追飛散容
與優游沐道教漸漬淹寒暑大德本無酬輕生竊
自許舟歸屬海運風積如鵬舉浮水暗舟艫合岸
喧徒侶凜凜窮秋暮初塞入洲渚鏡吹響清江懸
旗出長嶼桅檣迥不進杳浪高難拒回首泣親賓
中天望宛許帝城猶隱約家園無處所去矣方悠
悠含意將何語

渡連圻二首

此山多靈異峻嶒實非恆狀流自洄糾激瀨視奔
騰懸崖抱奇崛絕壁駕峻嶒磴上爭險岿嶇下
相崩百年積死樹千尺掛寒藤詭怪終不測迴沈
意難登願欲書聞見聊以寄親朋
連圻連不極極望在雲霞絕壁無走獸窮岸有盤

楂糾紛上龍窠穿豁下崑崙魚游若擁劍猿掛似
懸瓜陰岸生蛟蟠伏水拂澄沙客子行行倦年光
處處華石蒲生促節嚴樹落高花暮潮還入浦夕
鳥飛向家寓目皆鄉思何時見狹斜

下方山

寒鳥樹間響落星川際浮繁霜白曉岸苦霧黑晨
流鱗鱗逆去水瀾瀾急還舟望鄉行復立瞻途近
更修誰能百里地縈繞千端愁

入東經諸暨縣下浙江作

疲身不自量溫腹無恆擬未能守封植何能固廉
恥一經可人言三冬徒戲爾虛信蒼蒼色未究冥
冥理得彼既宜然失之良有以常言厭四壁自覺
輕千里日夕聊望遠山川空信美歸飛天際沒雲
霧江邊一作起安邑乏主人臨邛多客子鄉鄉自
風俗處處皆城市所見無故人含意終何已

還渡五洲

我行朔已晦泝水復沿流戎傷初不辨動默自相
求睠言還九派迴艫出五洲蕭散烟霧晚淒清江
漢秋沙汀暮寂寂蘆岸晚脩脩以茲南浦夜重此
北門愁方圓既齟齬貧賤豈怨尤

春夕早泊和劉諮議落日望水

旅人嗟倦游結纜坐春洲日暮江風靜中川聞棹
謳草光天際合霞影水中浮單艫時向浦獨櫂乍
乘流變童泣垂釣妖姬哭邊舟客心自有緒對此
空復愁

和劉諮議守風

彌旬苦淩亂揆景候阡陌晝想汝陽津夜夢邯鄲
驛憤風急驚岸屯雲仍觸石蕭條疾帆流魂碣衝
波白息榜易云久維梢晨已積蒼蒼極浦潮香杳
長洲夕本慚欣飛劍寧慕澹臺璧纖羅若不御跂
予中上澤

宿南洲浦

幽棲多暇豫從役知辛苦解纜及朝風落帆依暝
浦違鄉已信次江月初三五沈沈夜看流淵淵朝
聽鼓霜洲渡旅鴈朔颺吹宿莽夜淚坐淫淫是夕
偏懷土

學古贈丘永嘉征還

龍馬魚腸劍躩躩起風塵結客蕙河返喧喧動四
隣入墟猶憶舊覓巷復疑新窺見應門出遙識下
機人相悲淚欲下離別方自陳

和蕭諮議岑離閨怨

曉河沒高棟斜月半空庭窗中度落葉簾外隔飛
螢含悲_{玉臺作情}下翠帳掩泣_{玉臺作情}閉金屏昔期今未
返春草寒復青思君無轉易何異北辰星

嘲劉諮議

房櫳滅夜火窗戶映朝光妖女寒帷去黷躒初下
牀雀釵橫曉鬢蛾眉豔宿妝稍聞玉劍遠猶憐翠
被香寧知早朝客差池已鴈行

詠照鏡

朱簾旦初捲綺機晨未織玉匣開鑑影寶臺靜臨
飾對影獨含笑看花時轉側聊爲出顰眉試染天
桃色寶釵若可間金鈿長相逼蕩子行未歸啼妝

坐沾臆

擬青青河畔草轉韻體爲人作其人識節工

歌

春蘭_{一作日}應好折花望遠道秋夜苦復長抱枕
向空牀吹臺_{一作樓}下促節不言於此別歌筵掩團
扇何時一相見絃絕猶依軫葉落纔下枝卽此雖
云別方我未成離

學古三首

長安美少年羽騎暮連翩玉羈瑪瑙勒金絡珊瑚
鞭陣雲橫塞起赤日下城圓追兵待都護烽火望
祁連虎落夜方寢魚麗曉復前生平不可定空信
蒼浪天

鞏洛上東門薄莫川流側渾渾車馬道行人不相
識日夕棲鳥遠浮雲起新色寸心空延佇對面何
由卽飛輪倘易去易去因風力

昔隨張博望辭帝長楊宮獨好西山勇思爲北地
雄十年事河外雪_{一作雲}鬢別關中季月邊秋重嚴

野散寒蓬日隱龍城霧塵起王關風全孤君已復
半菽我猶空欲因上林鴈一見平陵桐

聊作百一體

靈輒困桑下於陵拾李蟾歷齒方嗟賤炙背豈知
豪傭畊乏旅力倚市憚劬勞曠日無豆鉢方冬缺
組袍清旦開蓬蓽舉目想煎熬樞機慎僕隸媒孽
畏朋曹萬途皆自僻一事豈他褒勿勿昨不定負
杖出蓬蒿逢施同溝壑值設乃糠糟生途稍冉冉
逝水日滔滔咸言等木石誰當出羽毛

早朝車中聽望

詰旦鐘聲罷隱隱禁門通遽車響北闕鄭履入南宮宿霧開馳道初日照相風香徒紛絡驛驕御或西東暫喧耳目外還保性靈中方驗游朝市此說不爲空

臨行公車

擾擾排曙屏鱗驅早駕禁門嚴猶閉嚴城方警夜道勝多增榮拙薄終難化以茲映滄質重與滄溟舍纚舟去濁河揆景辭清灞平生多意緒懷抱皆徂謝念此將如何撫心獨悲咤

秋夕歎白髮

絲白不難染蓬生直易扶惟見一作星星鬢獨與衆殊昔年十四五率性頗廉隅直是安被褐非敢慕懷珠何言志事晚疲拙嬰殊軀逢時乃倏忽失路亦斯須郊郭勤二頃形體憩一廡涸蚌困魚目籠禽觸四隅宵長壁立靜廓處謝懽愉月色臨窗樹蟲聲當戶樞飛蛾拂夜火墜葉舞秋株逐物均乘鶴違俗等雙鳧故人倘未弃求我谷之嶠

夜夢故人

客心驚夜魂言與故人同開簾覺水動映竹見牀空浦口望斜月洲外聞長風九秋時未晚千里路難窮已如臃腫木復似飄飄蓬相思不可寄直在寸心中

從主移西州寓直齋內霖雨不晴懷郡中遊聚

寓直慚虎賁沈迷豈職事祈祈寒枝動濛濛秋雨

駛不見眼中人空想山南寺雙桐傍欄上長楊夾門植夙昔構良遊接膝同懽志東西忽爲阻向隅懷獨思颯颯履聲喧擾擾羣分異臥聞復雷響坐視重局祕欲寄一行書何解三秋意

劉博士江丞朱從事同顧不值作詩云爾

故人篤久要新知從暮室崎嶇枉道過邂逅幽人出心期不會面懷之成首疾向夕敞山扉臨窗玩餘帙蜘蛛正網戶落花紛入膝浸淫水上風蔽虧霞中日良辰一攜手住坐無僞匹劉侯務屬書江生勤下筆朱君博辭理去追追名實是顧一參差何能更蓬華吾人少拘礙得性便遊逸方欲俟寒裳相從懽道術

春暮喜晴酬袁戶曹苦雨

振衣喜初霽寒裳對晚晴落花猶未捲時鳥故餘聲春芳空悅目游客反傷情鄉園不可見江水獨自清願得同攜手歸望對都城

苦熱

昔聞草木焦今窺一作沙石爛瞠瞠風逾靜瞳瞳日漸肝習靜悶一作衣巾讀書煩几案臥思清露浥坐待高星燦蝙蝠戶中飛蟻蠓窗間亂實無河朔飲空有臨淄汗遺金不自拾惡木寧無幹願以三伏晨催促九秋換

七夕

仙車駐七襄鳳駕出天潢月映九微火風吹百和香來懽暫巧笑還淚已沾裳一作依稀如洛汭倏忽似高唐別離未得語河漢漸湯湯

揚州法曹梅花盛開

免園標物序驚時最是梅
銜霜當路發映雪擬寒
開枝橫卻月觀花繞凌風臺
朝灑長門泣夕駐臨
邛杯應知早飄落故逐上春來

行經孫氏陵

昔在零陵厭神器若無依
逐兔爭先捷猗鹿競因
機呼噲開伯道叱咤掩江畿
豹變分奇略虎視肅
戎威長蛇蚺巴漢驥馬絕淮
邲交戰無內禦重門
豈外扉成功舉已棄凶德復
而違水龍忽東驚青
蓋乃西歸竭來已易一作永久
年代曖微微苔石疑
文字荆墳失是非山鶯空曙
響隴月自秋暉銀海
終無浪金龜會不飛闌寂今
如此望望沾人衣

塘邊見古塚

行路一孤墳路成墳欲毀
空疑年代積不知陵谷
徙幾逢經一作秋葉黃驟見
春流瀾金蠶不可織玉
樹何時蕊陌上驅馳人笑歌
自侈靡今日非明日
所念誰憐此

哭吳興柳惲

南州擅荆梓上國稱羽儀
伊人以戴德李公傷在
期遠識內無愠深衷外有規
一作清文窮麗則弘
論盡高奇多能誠所貴小善
聊復爲百步均射葉
八體妙臨池曲悟同神解
龜謀信有知入朝耿長
劍出牧盛層麾納言信加首
豐貂亦在移霞區兩
借寇貪泉一舉厄翰飛矯未
極朝露溘先危以茲
舊館想况乃西日垂蔓草生
車轍枯木臥崩抵樽
酒誰爲滿靈衣空自披眷言
尋惠好慟哭悲路岐

含毫徒有屬擗管竟無攜

登禪岡寺望和虞記室

南望南郭門拱樹梢雲密
北窗北溱一作道重樓
霧中出接樹隱高蟬交枝
承落日光陰不可捨懷
抱何由悉

答高博士

北窗涼夏首幽居多卉木
飛蜨一作弄晚花清池
映疎竹爲宴得快性安閑
聊鼓腹將子厭囂塵就
余開耳目

贈王左丞僧孺

欄外鶯啼罷園裏日光斜
游魚亂水葉輕燕逐風
花長墟上寒霧曉樹沒歸
霞九華暮已隱抱鬱徒
交加

敬酬王明府

星稀初可見月出未成光
澄江照遠火夕霞隱連
檣賤軀臨不測玉體畏垂
堂念別已零淚況乃思
故鄉

西州直示同員

日長禁戶倦卽事思短晨
漏盡唱聲急此理復傷
人矛盾交爲論光璧帶成
珍誓將收飲啄得得任
心神

野夕答孫郎擢

山中氣色滿墟上生烟露
杳杳星出雲啾啾雀隱
樹虛館無賓客幽居乏
懽趣思君意不窮長如流
水注

石頭答庾郎丹

高樹蔭樓密細草綠成被黃鸝隱葉飛蛺蝶縈空
戲陰岑自爾悅寂寥予罕寄相如阻禁闈何由從
簡易

日夕出富陽浦口和朗公

客心愁日暮徙倚空望歸山烟涵樹色江水映霞
暉獨鶴凌空一作逝雙鳬出浪飛故鄉千餘里茲
夕寒無衣

臨行與故游夜別

歷稔共追隨一旦辭羣匹復如東注水未有西歸
日夜雨滴空堦曉燈暗離室相悲各罷酒何時同
更一作促膝

胡興安夜別

居人行轉軼客子暫維舟念此一筵笑分爲兩地
愁露溼寒塘草月映清淮流方抱新離恨獨守故
園秋

車中見新林分別甚盛

金谷賓遊盛青門冠蓋多隔林望行轡下阪聽鳴
珂於時春未歇麥氣始清和還入平原逕窮巷可
張羅

曉發

早霞麗初日清風消薄霧水底見行雲天邊看遠
樹且望沿沂劇暫有江山趣疾免聊復起爽地豈
能賦

慈姥磯

暮煙起遙岸斜日照安流一同心賞夕暫解去鄉
憂野岸平沙合連山遠霧浮客悲不自已江上望

歸舟

見征人分別

淒淒日暮時親賓俱佇立征人拔劍起兒女牽衣
泣候騎出蕭關追兵赴馬邑且當橫行去誰論裹
屍入

同虞記室登樓望遠歸

登樓欲望遠遙遙見白衣白衣猶遠遠言是稍知
非對窗看寶瑟入戶弄鳴機無令日光晚門閣掩
重扉

與虞起室諸人詠扇

如珪信非玷學月但爲輪機杼靡蕪妾裁縫篋箚
人搖風入素手占曲掩朱唇羅袖幸拂拭微芳聊
可因

看伏郎新婚

霧夕蓮出水霞朝日照梁何如光燭夜輕扇掩紅
妝良人復灼灼席上自生光所悲高駕動環珮出
長廊

詠娼婦

曖曖高樓暮華燭帳前明羅帷雀釵影寶瑟鳳雛
聲庭花枝上發新月霧中生誰念當窗牖相望獨
盈盈

詠舞

管清羅薦合絃驚雪袖遲逐唱迴纖手聽曲轉蛾
眉凝情眇墮珥微睇託含辭日暮留嘉客相看愛
此時

望新月示同羈

初宿長淮上破鏡出雲明今夕千餘里雙蛾映水
生的與沙靜灩灩逐波輕望鄉皆下淚非我獨
傷情

詠春雪寄旅人治書思澄

可憐江上雪迴風起復滅本欲映梅花翻悲似玉
屑朝驚日弄響暮條行可結咸言不適時安知非
嬌節

和司馬博士詠雪

凝堦夜似月拂樹曉疑春蕭散忽如盡徘徊已復
新暫蔽卷紉質復慚施粉人若逐微風起誰言非
玉塵

詠白鷗兼嘲別者

可憐雙白鷗朝夕水上游玉塵何言異棲息雌住
雄不留孤飛出淞浦獨宿下滄洲東西從此別影
響絕無由

行經范僕射故宅

旅葵應蔓井荒藤已上扉寂寂空郊暮無復車馬
歸激灑故池水蒼茫落日暉遺愛終何極一作興家今如
此行路獨沾衣

王尚書瞻祖日

昱昱丹旄振亭亭素蓋立金鐸謹已鳴龍輻將復
入華臺日未徙荒墳路行溼已矣將何如賓馭皆
灑泣

送褚都曹

君隨結客去我乃倦遊歸本願同棲息今成相背
飛

送司馬□入五城

隨風飄岸葉行雨暗江流居人會應返空欲送行
舟

邊城思

柳黃未吐葉水綠半含苔春色邊城動客思故鄉
來

爲人妾思二首

魂銷形已去釵落猶依枕欲去淚無皆不堪悲復
甚
機中刺繡所窗下朝妝處未憶神已傷欲忘悲不
去

爲人妾怨

燕戲還簷際花飛落枕前寸心悲不見拭淚坐調
絃

閨怨二首

竹葉響南窗月光照東壁誰知夜獨覺枕前雙淚
滴

閨閣行人斷房櫳月影斜誰能北窗下獨對後庭
花

南苑

花門闌千扇苑戶開萬扉樓殿聞珠履竹樹隔羅
衣

苑中見美人

羅袖風中捲玉釵林下耀團扇承落花復持掩餘
笑

詠春風